





西南洋五印度國志

叙曰西南洋爲印度海惟西北二印度尙各自爲國其中南東三印度並據于西洋東印度爲英夷駐防重鎮凡用兵各國皆調諸孟加臘每卒月餉銀約二十員又與我屬國緬甸廓爾喀鄰近世仇故英夷之徇中國與中國之籌制英夷其樞紐皆在東印度南印度斗出南海有佛蘭西彌利堅葡萄亞荷蘭呂宋各國市埠環列而英夷之市埠曰曼達薩喇曰孟邁皆產鴉片煙與孟加臘塔各國不得分其利恒外睦內猜故我之聯絡佛



蘭西彌利堅及購買船礮其樞紐皆在澳門與南印度  
中印度爲英夷與俄羅斯相拒之所中惟隔一與都哥  
士大山俄羅斯踰山則可攻取溫都斯坦英夷設重兵  
扼守之故我之聯絡俄羅斯其樞紐在中印度不悉東  
印度之形勢則不知用廓夷雖有犄角擣批之策而不  
敢信也不知南印度之形勢則不知用佛蘭西彌利堅  
欲行購造兵船之策而末由決也不知中印度北印度  
之情形則不知聯俄羅斯方詢俄羅斯國都與英夷國  
都遠近不知其相近者在印度邊境而不在國都也昔

唐太宗貞觀中王元策用吐番之兵以擣印度卽廓爾  
喀攻孟加臘之路元太祖兵至北中二印度而返及憲  
宗命諸王旭烈先攻取西印度而後回取五印度卽今  
俄羅斯侵徧溫都斯坦之路明三寶太監鄭和以舟師  
破錫蘭山俘其國王歸獻諸朝卽今粵夷兵船赴南印  
度之路具載往牒近徵商舶事異鑿空形同肘腋指示  
發蹤誰端銜策志西南洋實所以志西洋也故以東南  
中三印度冠其前而以西印度之天方教天主教附其  
後五印度沿革又附其後



海國圖志目錄卷

西南洋諸國

卷十三

西南洋三印度國

即古佛國也沿草別見在後

卷十四

西印度之巴社回國

今為回國沿草附

西印度之阿丹回國

回教祖國。附天方教考

卷十五

西印度之如德亞國

天主教祖國附天主教考



卷十六

西南洋南都魯機國

一名小都魯機今亦回教沿革附

西印度之四代國

天志卷

西印度之四代國

天志卷

西印度之四代國

天志卷

西印度之四代國

天志卷

海國圖志

海國圖志卷十三

西南洋

歐羅巴人原謨

侯官林則徐譯

邵陽魏源重輯

三印度國

東南中三印度今皆屬英吉利惟西北二印度各自為國

印度國即興都斯頓也

一作痕都斯坦一作溫都亦有作軒都斯丹者

地隸阿

細亞洲西南地廣壤沃產豐甲於諸國其國如何割治

諸記未詳查探險寶記僅云為數小國而西流古士記

又云大國以巴利摩刺臘為國都仍未載及主國者為



誰竟不知印度為古佛國蓋由西洋人奉天主教不覽佛書而近日印度又為回教久據力長佛教踪跡也 大西洋有公記始杰志中東南中三印度諸部落尙奉

云壯麻墨合印度可臘山達達里共為一國後被俄利

所滅俄利傳至巴旦王耶蘇紀歲千三百九十八年明建

文二年又為底摩阿所滅底摩阿傳百餘年後悉歸蒙古

此蒙古謂賽馬兒罕之王嗣各部落隔大山之險不服蒙古統轄各

自立主各部中又以馬拉他為最强此南印度主國非東印度之孟加臘

也至西北溫大壓山麻臘耦特爾希阿俄臘等部均歸

馬拉他所轄南隅麻疏一部為哈達阿里所據加補爾

部為阿密沙所據阿密沙與馬拉他交戰時各部互相

攻擊英吉利乘隙征服東隅遣賀威廉駐防孟阿臘遣

賀族乞駐防遂于鼻達拉薩孟買兩處開埠貿易貨物

充徠各國商舟雲集是時惟哈達阿里尙強不服英吉

利于是印度之蕪拉扎道臘統兵與英人爭鬪收賀威

廉部眾置之黑獄英吉利遂遣律記利付奪復其地別

置頭目後至千七百六十五年乾隆三十年復又背叛全滅

英吉利之人英吉利王復遣薩依姑底奪復疆域自此

印度地屬于英國者十三部曰孟阿臘曰曼達臘薩曰



孟買曰彌那曰歐尼曰瀝部曰麻疏曰薩達臘曰稔哇  
日特那彎戈曰果真曰那治勃曰西倫島其各自為主  
者曰新低曰阿魯斯曰尼保爾曰新尼曰即茅爾且數

部而已

此數部乃中印度南印度之邊境未盡屬英吉  
利者若西北二印度又不在此數部之內觀英

夷所繪印度圖印度河東岸尚係青色不盡  
在所保黃色各國之內可證即此數部也

孟阿臘以

加爾格達為首部計幅員二十二萬零三百十二萬方

里戶口六千九百七十一萬名外有八萬五千七百方

里未計戶口英吉利派加稔那一人

加稔那  
官名也

駐劄孟阿

臘理糧餉鹽法貿易鴉片兵丁醫館等事隨員四人分

理各事曼達那薩幅員十四萬一千九百二十三方里

戶口千三百五十萬八千五百三十五名英吉利派加

稔那一人駐劄曼達那薩理糧餉鹽法貿易鴉片兵丁

醫館等事孟買幅員五萬九千四百三十八方里戶口

六百二十五萬一千五百四十六名外有五千五百五

十方里未計戶口英吉利派加稔那一人駐劄孟買理

糧餉鹽法貿易鴉片兵丁醫館等事定例曼達那薩孟

買兩處加溫那仍歸孟阿臘統轄此外別設靡宿各一

人執連其七十六人統設叙坡兵十八萬一千五百一



十七名英吉利兵八百名蘭頓王家兵二萬名曰王家  
兵者雙分口糧也彌那幅員九萬六千方里戶口一千  
萬名歐尼幅員二萬方里戶口三百萬名薩達臘幅員  
一萬四方里戶口百五十名特臘彎戈果眞幅員八  
千方里戶口一百萬名那治勃幅員二十八萬三千方  
里戶口千六百五十萬名西倫烏幅員二萬四千六百  
六十方里戶口百萬名俱英吉利統轄而各部頭目則  
由部民公舉尙有新低阿幅員四萬方里戶口萬四百  
名魯斯幅員五萬方里戶口三百萬名所屬加斯彌野

幅員一萬方里戶口百萬名尼保爾幅員五萬三千方  
里戶口二百萬名新尼卽茅爾且幅員二萬二千方里  
戶口百萬名此皆自主之部落不屬英國所轄河道三

安治士河

卽恒河

發源謙麻那壓山希臘特河發源阿山

俱至孟阿臘出海新地河又名興都士河發源西藏經  
歷數千里至達岱入海產棉花胡椒檳榔檀香蕪木糖  
洋靛牙硝絹紗羊毛鑽石金沙貓兒眼石碧玉水晶寶  
石銀鐵硫黃砒霜洋參鉛椰子象虎地毯襪緞布姜黃  
荳蔻肉桂鴉片鴉片爲最鉅之貿易英吉利獨擅其利



初時尚稀近則徧地皆種以麻尼哇所產為最每年出  
港共六千五百滿六十斤為一滿每滿價約百二十五員以上原本

案此所述鴉片專指麻尼哇一處非全數麻尼哇一作麻爾注乃自主部落非英夷所轄

重輯 原無今補

貿易通志曰印度之地距大西洋數萬里自古不相通  
其通商自荷蘭始萬歷二十二年荷蘭商船駛至南海  
五印度市胡椒返棹大獲利於是設公班衙僅洋銀三  
萬圓積久增至三百萬員主其事者六十五商及明泰  
昌間僅二十年公班衙所贏銀已千有四百萬員每歲

大船四十旋據南海葛留巴洲建總埠順治四年遂與  
佛蘭西國分擅其利於是荷蘭公班衙大興東通暹羅  
日本又據臺灣雄長南洋諸島間每年文武使費銀百  
五十萬員其後雖失臺灣仍踞暹羅東南方地與各國  
互市康熙三十八年再稟求其國王賜勅書定歲貢額  
銀九十萬員每歲別獻費賻儀銀十五萬員公班衙即  
公司之異名也方荷蘭之立公班衙於南洋英吉利商  
慕之於萬歷二十七年糾國人合貲本且稟求國王設  
立公司嚴禁本國散商之赴南洋者其始國人尚憚險



遠僅合費十五萬員次年增至二十六萬員獲利皆三  
倍且途劫荷蘭國葡萄牙國之商船以歸於是英吉利  
公司漸興與荷蘭公班牙據地爭權英吉利乘機於印  
度海濱開新地立商埠其印度國民尙外視而輕忽之  
時商船僅三十五隻費本僅三十五萬員國人屢稟求  
散公司之局於是國王令他商於印度西方孟買嶼立  
新公司兩公司相傾軋康熙四十年始合兩公司爲一  
并借國王公帑銀一千萬員歲息八十萬員其後復貸  
五百萬員免其利息於是英吉利南洋公司大盛乾隆

四年東印度兵爲北印度侵逼且臣下自相割據結荷  
蘭佛蘭西公班衙之兵爲助於是英吉利公司兵船乘  
機取印度海南地印度國王求援于荷蘭佛蘭西并力  
拒敗英吉利之兵乾隆二十四年後英吉利復興兵與  
戰荷蘭及佛蘭西連年軍旅供億浩繁雖歲稅四百餘  
萬人不贍出非惟盡逋本國之貢獻反借其國帑數百  
萬生計日耗至乾隆五十年遂敗於英吉利嘉慶十六  
年英吉利遂據公班衙之地佛蘭西公班衙散局惟與  
各國分市南印度其東中兩印度大半歸英吉利道光



十三年國中會計公司貿易無利且虧空公項以鉅萬計始散公司局聽散商自運人人皆悅  
每月統紀傳曰明宏治年間葡萄牙人精神湧發營大圖艱始尋水路到五印度國歐羅巴沿海各邦聞知之皆乘船踵至其地葡萄牙亞官禁之令師艦縱橫洋面截劫商船各國商船不敢孤行故各人出錢或千員或萬員或三萬員積藏公帑備船砲募弁兵遇葡艦海賊則決戰保貨返國則以所載之貨發賣各捐戶公分其利由此立商會曰公班衙公班衙者爲羣商捐措資本錢

共作貿易也荷蘭公班衙爲首始出公銀二百五十萬員赴牙瓦洲摩鹿羣島買丁香胡椒等貨歸國獲益一倍年年續駛南海利路大開始則向土酋買地開新埠後則開釁戰鬪而奪其旁地兵盛勢強兩攻壘門敗退因據臺灣之港口與福建沿海居民貿易開墾愈廣錢貨益增船舶滿海築城建邑商變爲君後有爲福建鄭成功所攻時荷蘭公班衙通事何斌知港路深淺說成功聯檣並進荷蘭嚴守安平大港成功從鹿耳門進水漲三丈餘入據臺灣與荷蘭相持甚久圍其堡臺鏖戰



不息鎮守官乞盟返棹回國康熙二年公班衙雖失此地別奪他島建城立埠復興貿易自東自西自南自北每年奉本國王銀十五萬員別納一百萬員以答國恩嘉慶年間與英吉利國構兵攻伐忽然公班衙不幸其船或沉淪或被奪英總兵乘機取其新地荷蘭公司散局將所據之地奉歸本國英吉利公班衙始與荷蘭相合但每開罅隙屢次交鋒於是公班衙密合防禦其本錢八百萬員爭鬪良久後再立公班衙於五印度國建兩城東邊曰馬大刺西邊曰夢買其時彼國土官貪賄

慕勢私收陋規其土君復側目公司之利誓逐英軍而奪其業乾隆十七年奮力攻戰交鋒未及十餘合土君皆敗散自後英吉利特命總理官兼攝五印度國大半之權佛蘭西人恨之費力費帑圖勝英軍英兵冒火突鋒鏖戰佛蘭西兵終敗于是土君割地求和不敢強逼自三印度國屬英公班衙之後所獲地廣不盡貿易惟務治國而已向來所赴廣東商船致載茶葉自道光十四年不利于市公司雖散掌握尙存每年所收國帑之銀共計一千五百萬員但使費亦繁所餘者無幾

以上無皆



無昔  
今補

海島逸志曰明絞臂

即孟加臘 譯音之殊

在葛留巴之西土地亦

甚寬大和蘭色仔年紅毛雜處其地四夷雲集交商之所百物俱備貨賄流通土產大呢羽緞嗶支

案道光二十二年四月靖逆將軍奕山奏風聞暎逆所屬之孟阿刺地方向有英夷兵日帶領黑白夷兵各數百名駐守因黑夷出兵在外多有傷亡僅剩白夷兵不敷駐守該逆兵目於去冬勒派土夷商民充當兵役因而構怨羣起刺殺夷目並將白夷兵數百名焚斃殆盡嗣又據香港探報英逆前佔孟阿喇埠頭藉產鴉片厚利得充兵餉因被孟阿喇麼佬鬼子將八顛之弟殺死奪回鴉片埠以至兵餉不繼等語又訪問得英國之東另有思田國相距約三月水程英夷欲奪其地被思田國設計誘騙於本年正月內

殺斃英兵萬餘名現在干戈仍未止息等語又傳聞逆夷先與喀布爾打仗現在又與治拉拉拔打仗有地名古斯尼仍被治拉拉拔奪回該逆夷深恐喀布爾與治拉拉拔和好又訪問喀布爾與孟阿喇各處總名印度等語。案喀布爾即加布爾乃阿什類尼國之部落在中印度西境詳見于下

每月統紀傳曰孟買部在痕都斯坦西南方其酋部城

建於嶼其嶼初為葡萄亞所屬地後讓與英國至順治

二年間英國王以此嶼賜公班衙治理當時嶼甚荒杳

潮漲水溢巨浸地也英人駐三年水土不服染病多死

英人勉築隄防火烈山澤建磚屋開衙衙招來流寓戶

口繁滋其嶼雖饒瘦終年之產不足一月之用却烟戶



十六餘萬皆恃貿易爲業洋艘七百餘隻皆往印度西北及法耳西阿拉比及中國各處所載出藥材棉花瑪瑙石等貨除英國商賈外有白頭回及法耳西商賈白頭人本法耳西國之土民當回教始興盡力征服四方不順奉者必遭刑戮致令多人往印度避害其人皆儉約勤作善貿易惟崇拜陰陽每當日出日入之際叩首敬奉然其俗好善施濟扶困持危惜無人告以福音之真道也英國在孟買建造戰船其匠皆白頭人手藝甚巧

塔喇瓦府每年納餉七十萬員昔屬瑪哈喇塔國其國本有大權勢因與回回戰鬪不息而後衰敗民遂任意作亂諸侯操權戰鬪爲務自王達於庶民俱劫奪爲業婆羅門僧狡獪巧捷煽惑民人恐嚇取財既貯藏銀王卽革頂奪其不義之利嘉慶二十年間瑪哈喇塔王攻孟買肆焚掠與英軍交鋒瑪哈喇塔兵敗走諸侯皆服百姓甘順自從英人操權匪徒安分其王除位而安享空祿

乾底士府屬省治不久其郡係盜藪農廢田荒獨守堡



臺土人只捕野獸故其猛烈捐軀而戰風俗甚蠻且不  
守婆羅門教乃供奉汚鬼塑偶近于禽獸

君乾分作南北兩府皆豐腴地出米糖等貨亞美塔拔  
府先爲回回之國徵歛賧削百姓盡窮後已復興惟嘉  
慶二十四年遭地震敗廢該一府之士人崇婆羅門邪  
教常殺怨敵以獻神贖罪英國律例嚴禁然作亂不已  
當用軍防範

蘇喇府在大南洋北方昔海賊之藪故公班衙立一幫  
師船巡海剿賊今始安靜地產棉花織布精工府城卽

印度國當回教興旺時戶口有八十萬人現在減少十  
五萬口建放生院養各禽獸不論犬馬鳥蟲諸類皆養  
之不殺布羅者府陸海地方久歸英國掌管

北方各府其名吉斯喇地方居民皆印度國之士人俗  
尙火葬婦與夫屍同燒嬖妾爭先蹈焰貴家悲養女辱  
門輒殺之無惻隱之心而婆羅門僧亦無警醒之言反  
勵磨愚民行溺女之罪近日英國嚴禁此弊

以上原本  
無皆今補

五印度東界西藏緬甸西南界海北界韃韃里近日東  
南中三印度皆屬英吉利其自主之國惟西北二印度



耳孟阿臘孟買曼達那薩均濱海大市埠 以下又原本

孟阿臘東印度部落東界緬甸西界麻哈南界海北

界西藏廓爾喀領小部落二十一俗奉墨那敏教即

古時佛教也首部落曰噶里噶達重兵駐防商民環

處樓閣園亭街衢廛市盛甲南海設有鴉片公司此

巴達那默那出產鴉片均歸入公司由公司發售出

口

麻哈東印度部落東界孟阿臘西界阿臘哈墨北界

尼保爾南界尼路阿那領小部落十俗奉墨那敏佛

教而尼達那出產鴉片曰黑土又曰公班

尼路阿那東印度部落東界麻哈孟阿臘西界彌里

阿南界那特蘭北界阿臘哈墨領小部落三十俗奉

墨那敏佛教

阿蘭牙墨南印度部落東界彌那南界靡渣布西界

海北界堪力市領小部落九俗奉墨那敏佛教海錄

謂居斯士者為巴史種類顏色稍皙即今來粵貿易

之白頭夷也家多溫厚人習商賈所屬孟買為麻爾

洼鴉片出口之埠頭



厘加那特南印度部落東南俱界海北界麻臘耦西  
界特臘彎戈在孟阿臘西少南陸行二十餘日水路  
順風五六日領小部落二十有一俗奉墨那敏佛教  
海錄謂之曼達喇薩居斯土者為雪那里種類出產  
鴉片一曰金花紅一曰油紅以金花紅為最

阿那哈默南印度部落東界麻哈西界麻爾洼南界  
尼路阿那北界歐尼領小部落十有二俗奉墨那敏  
佛教產鴉片曰黑土遜于巴達那

麻爾洼南印度部落東界阿臘哈墨西界吾治瀝南  
界堪力市北界臘赤布達那領小部落十有二俗奉  
墨那敏佛教產鴉片中國謂之白皮

吾治瀝南印度部落東界麻爾洼西界刮治南界海  
北界臘赤布撻那領小部落十有六俗奉墨那敏佛  
教

特那彎戈南印度部落東界厘加那特西界海南界  
海北界果真領小部落二俗奉墨那敏佛教

果真南印度部落海錄作固真東界戈彎都西界海  
南界特那彎戈北界馬那麻領小部落二俗奉墨那



敏佛教

彌那南印度部落東界尼路阿那西界阿蘭牙墨南  
界海里那墨北界摩那領小部落六俗奉墨那敏佛  
教

歐尼南印度部落東界麻哈西界阿尼那南界阿那  
哈默北界尼保爾領小部落六俗奉墨那敏佛教

西倫島在黎加那特之東南領小部落九俗墨奉那  
敏佛教

靡渣部南印度部落東界海里那墨南界麻疏西界

海北界阿蘭牙墨領小部落十有五俗奉墨那敏佛  
教

麻疏南印度部落東界麻那耦南界歌壬麻都西界  
加那臘北界麻臘耦領小部落十俗奉墨那敏佛教  
馬拉他南印度部落東界歌壬麻都西界海南界果  
真北界加那臘領小部落四俗奉墨那敏佛教產鴉  
片

加士敏耶中印度部落東北俱界西藏西南俱界臘  
和爾領小部落一俗奉墨那敏佛教



臘和爾中印度部落東北俱界西藏南界特爾希西  
界牙爾士丹領小部落十有五俗奉墨那敏佛教

俄爾洼中印度部落東界西藏西界特爾希南界尼  
保爾北界西藏領小部落二俗奉墨那敏佛教

特爾希中印度部落東界俄爾洼西界臘赤布達那  
南界阿厄臘北界臘和爾領小部落十俗奉墨那敏

佛教

臘赤布達那南印度部落東界阿厄臘西界茅爾旦  
南界麻爾洼北界臘和爾領小部落十有八俗奉墨

那敏佛教

茅爾旦即新地南印度部落東界臘赤布達那西界  
麻凝士丹北界臘和爾領小部落七俗奉墨那敏佛

教

刮治南印度部落東界吾治瀝西界海南界海北界  
茅爾旦領小部落四俗奉墨那敏佛教

阿厄臘南印度部落東界歐尼南界阿臘哈墨西界  
臘赤布達那北界特爾希領小部落五俗奉墨那敏

佛教



尼保爾中印度部落東界西藏西界俄爾注南界孟  
阿臘北界西藏領小部落四俗奉墨那敏佛教

呵里沙東印度部落東界孟阿臘南界海西界特蘭  
沙加爾司北界尼路阿那領小部落五俗奉墨那敏  
佛教

特蘭沙加爾司東印度部落東界呵里沙西界麻那  
耦南界海北界尼路阿那領小部落十有二俗奉墨  
那敏佛教

海里臘墨東印度部落東界尼路阿那西界靡札布

南界麻那耦北界彌那領小部落六俗奉墨那敏佛  
教

靡臘東印度部落東界尼路阿那南界彌那西北界  
堪力市領小部落三俗奉墨那敏佛教

堪力市東印度部落東界尼路阿那南界靡臘西界  
吾治瀝北界麻爾注領小部落三俗奉墨那敏佛教

麻那耦南印度部落東界特蘭沙加爾司西界麻疏  
南界里加那特北界海里那墨領小部落五俗奉墨

那敏佛教



海國圖志卷十三西南洋  
加那臘南印度部落東界麻疏南界馬拉他西界海  
北界麻查布領小部落五俗奉墨那敏佛教

歌壬麻都南印度部落東界西林西界馬拉他南界  
里加那特北界麻疏領小部落一俗奉墨那敏佛教  
西林南印度部落東界里加那特西界歌壬麻都南  
界里加那特北界麻那耦領小部落一俗奉墨那敏

佛教

原本止此

三印度補輯

原無今補。此專取本朝近口情形其歷代沿革別見後卷不在此內

高宗御製文集五天竺說曰昆侖居大地之中天下萬

國環之昆侖以東我大清國最大昆侖以西南五天竺  
國最大昆侖以西鄂羅斯國最大今回疆與痕都斯坦  
相接其國卽印度故境以中國之力欲通五天竺國何  
難但出于招致非彼之慕德嚮化而來故不爲耳

又御製詩集題大西天草書普吉祥玉印序曰痕都去  
衛藏甚遠道里莫得而詳卽古五印度也相傳彼處有  
佛遺跡而今彼處佛教乃式微外道轉盛俗稱爲大西  
天若回人之痕都斯坦蓋印度之一耳茲得玉印二方  
體近天竺因令侍衛巴忠持詢章嘉胡土克圖據稱是



大西天草書一曰薩爾瓦漢語普也一曰莽噶拉穆漢語吉祥也首歲得此實為兆庶錫福之徵

海國聞見錄小西洋居於丙午丁未方按此沿俗稱西南洋為小西洋

與今志例不合從麻刺甲暹羅繞西沿山而至於白頭番國人

即西域之狀捲鬚環耳衣西洋布大領小袖纏腰頭裏

白布故以白頭呼之國有二東為小白頭國名莫臥爾即痕都斯坦

西為包社大白頭即伯爾西亞二國北接噶爾丹國而噶爾

丹國之北案噶爾丹乃準部在葱嶺東與小西洋包社等國不相接當作賽馬爾罕在葱嶺西此誤

混為一國鄰細密里亞國細密里亞國之西為俄羅斯國案

密里亞即悉畢厘阿乃俄羅斯東藩與中國新疆喀什黑龍江連界者皆是也原圖誤析俄羅斯與細密里亞為二國故滋闕者之疑今仍原文而附訂於此

頭北與大白頭皆聯賽馬爾丹西北枕裏海東西鄰多

爾其西南鄰阿黎米亞即天方阿丹回國南臨大海○多爾其

分東西二國皆回回東多爾其機注國不通海東鄰大

白頭東北傍裏海北接惹鹿惹亞即南都魯機西鄰西多爾

其即如德亞今并入天方回國南接阿黎米亞回教○裏海者諸國

環而繞之東北細密里亞即哈薩克西北俄羅斯東賽馬爾

丹賽馬爾丹者明代國名也今則為放罕布哈爾愛烏罕等國西惹鹿惹亞前都魯機西



南東多爾其即機注南包社大白頭內瀝大泊不通海

棹其水惟從包社出海故為裏海○惹鹿惹亞一國亦

不通海東傍裏海西傍死海北聯俄羅斯南接東西多

爾其女人姿色美而毛髮紅氣味臭即古之西女國故地衣着同

白頭貢於包社○死海者即黑海源從地中北俄羅斯

南西多爾其東惹鹿惹亞西珉年呻即北都魯機四面環繞

不通大海故為死海而西多爾其珉年呻二國不通小

西洋之海而濱於中海之東北中海從大西洋之海而

入語附大西洋記○阿黎米亞即阿丹天方東鄰包社

大白頭北接東西多爾其西北濱於大西洋之中海西

聯烏鬼國陸地一隅自西至西南與烏鬼之地隔對一

海南臨大洋國為多爾其所屬貢男女於多爾其為奴

婢今天方之默德那阿丹圖亦臣服于包社也

中印度補輯

西域聞見錄溫都斯坦亦西域回國之大者也葉爾羌

西南馬行六十餘日至克食米爾克食米爾復西南行

四十餘日至溫都斯坦水亦可通兩地貿易之人多資

舟楫往來不絕稱其王曰汗其都城雄壯周圍六十餘



里轄大小回城三百七十餘其人深目高鼻多鬚目睛  
黑白光如琉璃而黑唇青言語類鳥鳴回子亦不能辨  
衣敞前襟頭纏花布厥土黑墳地極溽暑瘴癘爲害人  
有頭面生贅疣引之而長放之而縮者地以象耕服車  
致遠皆取給於象有牛馬無駝羊騾驢不解游牧之事  
粳糯秔稻及瓜果蔬菜靡不繁植檳榔桄榔櫻欄橘柚  
在在成林冬不凋葉人習技巧金漆雕縷制作精奇所  
製玉器薄如蟬翼文成如髮抽金銀爲絲織綢緞毡布  
遍貨於西域各國及各回城所居穴地深數丈旁掘土

洞爲室室亦絕精飾以金玉從無地上起屋並圍亭之  
事其城村似曠邈無人烟處也郭外大澤一山水秀麗  
花木蔚然居人多攜眷乘舟累月經旬游於其內多美  
釀尙宴會必費數百金亦多載酒泛舟於澤中者比其  
地之公私事務及一切農工商旅操作交易皆於夜間  
爲之日出則伏國旣富庶風俗奢靡其他亦有玉山獨  
少白金價過黃金也最貴中國磁器或有携至其國者  
爭以白玉盤碗交易而去惟恐失之而大黃尤爲至寶  
以黃金數十倍兌換蓋其地之一切疾病瘡瘍得大黃



海國圖志 卷十三 西南洋  
卽愈百不失一貴客來及大筵宴皆以大黃代茶人若  
經年不服大黃則必死故雖貧苦小回亦必有一半兩  
大黃囊胸前舌舔而鼻嗅之其地之江河皆通海洋時  
有閩黃海航到彼停泊多有以大黃漁利者兩廣福建  
之物往往有之或重販至葉爾羌轉入中國矣哈什噶  
爾回子買得漳絨一端上有天順字號固閩貨也其國  
西隅有巨澤圍數千里澤中有山圍踰千里萬峯聳峙  
高入雲天或曰人間第一高山也名曰牽各里麻膽達  
喇斯山中產獅子于秋月皎潔輒負雛于山中往來頭

大而毛虬尾形如帚黃質黑章如虎皮長六七丈時登  
山絕頂望月垂涎咆哮跳擲猛飛吞月有飛去八九里  
十餘里而墜死山谷中者其國人以豢養獅子爲上戶  
每當秋月其汗使人取獅以金鐵作柱大如瓮密布層  
遮圍畜之於其中飼以牛時而吼如雷霆滿城震動人  
畜不寧椿園氏曰乾隆四十年有溫都斯坦之海關達  
爾遊至回疆子晤其人面黑唇青睛如琉璃據云彼乃  
其地之白皙者耳又云其國之西南數萬里有黑白之  
人白者如雪黑者如漆國在大海之中得毋卽東粵之



所謂黑鬼白鬼者歟因細談其地之事甚詳與予向所聞無異而牽各里麻膽搭拉斯之山高聳至極靈蹟最著其即古人所言日繞之峯歟顧山雖至高無出沒日月之理四圍皆水舟楫可通亦無所謂弱水焉案溫都一作輿都即印度身毒之轉音也坤輿圖職方圖皆作莫卧爾國蓋中印度也其西北大澤即所謂裏海也裏海中高山而疑為須彌陁不是辨其地暑而多瘴多雨類閩廣水上惡劣之鄉而山有寶地生毛故人繁而殷富惜乎象胥通言不能盡解其說所得考核存據者亦僅參半焉爾

東印度補輯

海錄烏土國在暹羅蓬牙西北疆域較暹羅更大山蓬牙陸路行四五日水路順風約二日到佗至為烏土屬邑廣州人有客於此者又北行百餘里到媚麗居又西北行二百餘里到營工又西行二百餘里到備姑俱烏

土屬邑王都在盡畫由備姑入內河

內河即恒河會大金沙江海口水

行約四十日方至國都有城郭宮室備姑鄉中有孔明城周圍皆女墻參伍錯綜莫知其數相傳為武侯南征時所築入者往往迷路不知所出云北境與雲南緬甸接壤雲南人多在此貿易衣服飲食大約與暹羅同而



樸實仁厚獨有太古風民居多板屋夜不閉戶無盜賊  
爭鬥國法極寬有過犯者罰之而已重則圈禁旬日而  
釋無殺戮撲楚之刑實南洋中樂國也男女俱椎髻婚  
姻畧同中國死葬於山不封不樹土產玉寶石銀燕窩  
魚翅犀角泥油紫景兒茶寶石藍者爲貴以其難得也  
泥油出土中可以然燈紫景亦土中所出可代印色自  
安南至此及南洋諸國沿海俱有鱷魚形如壁虎是食  
人土番有被鱷吞者延番僧咒之垂釣于海食人者卽  
吞鈎而出其餘則不可得也由備姑西北行沿海數千

里重山複嶺并無居人奇禽怪獸出沒號叫崇巖峭壁  
間多古木奇花所未經覩舟行約半月方盡亦海外奇  
觀也○徹第岡在烏土國大山之北數十年來英吉利  
新闢之地未有商賈其風俗土產未詳

案此皆印度之  
東境卽古柯枝

也國  
又曰明呀喇

卽孟  
加臘

英吉利所轄地周圍數千里西南諸

番一大都會也在徹第岡海西岸由徹第岡渡海順東  
南風約二日夜可到陸路則初沿海北行至海角轉西  
又南行然後可至爲日較遲故來往都由海道其港口



名葛支里港外沿海千餘里海水渾濁淺深叵測外國  
船至此不能遽進必先鳴礮使土番聞之請於英吉利  
命熟水道者操小舟到船爲之指示然後可土番亦必  
預度其深淺以泡志之泡者截大木數尺製爲橈形空  
其中繫之以繩墜之以鐵隨水道曲折浮之水面以爲  
之志土番謂之泡每一望遠及轉折處則置一泡然外  
人終不能測是殆天險也港口有礮臺進入內港行二  
日許到交牙礮臺又三四日到古里噶達英吉利官軍  
鎮明呀喇者治此有小城城內唯住官軍商民環處城

外英吉利官吏及富商家屬俱住漲浪居漲浪居者城  
外地名也樓閣連雲園亭綺布甲于一國英吉利居此  
者萬餘人又有叙頗兵五六萬卽明呀里土番也曾長  
有三其大者曰卽攸士第其次曰尼里又次日集景皆  
命于其王數年則代國有大政大訟大獄必三人會議  
小事則聽屬吏處分其統屬文武總理糧餉一人謂之  
辣亦數年而代其出入儀仗較三會長特甚前有騎士  
六人後有四人左右各一人俱穿大紅衣左右二人裝  
束俱同辣唯辣所穿衣當胸繡八卦文爲異耳凡鞫訟



訟上下俱青衣唯三會長兩肩有白絨緣頭戴白帽會長上坐客長十人旁坐客長客商之長也每會鞠必延客長十人旁坐欲與衆共之也其獄必僉曰是然後定讞有一不合則復鞠雖再三不以爲煩然怙奢尙利賄賂公行徒事文飾無財不可以爲說也其土番有數種一明呀里一夏里一巴藍美明呀里種較多而巴藍美種特富厚明呀里食牛不食豕夏里食豕不食牛巴藍美則俱不食富者衣食居處頗似英吉利以華麗相尙貧者家居俱裸體以小幅布圍其腰臍以掩下體男女

皆然謂之水幔無來由番亦多如此有吉慶則穿長衣窄袖其長曳地用白布二丈纏其頭以油徧塗其身所居屋盡塗以牛糞交易以文螺壳爲貨貝娶妻皆童養夫死鬻髮而居各種不相爲婚男子胸蓋數小印額刺紋女皆穿鼻帶環巴藍美死則葬于土餘俱棄諸水明呀里間有以火化者更有仇儼敦篤夫死躍入火中以殉者自此以西地氣漸寒中華人居此者可穿夾衣非若東南洋諸國四時俱單衣也土產鴉片煙硝牛黃白糖棉花海參瑇瑁訶子檀香鴉片有二種一爲公班皮



色黑最上一名巴第古喇皮色赤稍次之皆中華人所  
謂烏土也出於明呀喇屬邑地名巴且拏其出曼達喇  
薩者亦有二種一名金花紅為上一名油紅次之出馬  
喇他及盎几里者名鴨屎紅皆中華人所謂紅皮也出  
孟買及即杜者則為白皮近時入中華最多其木似嬰  
栗葉如靛青子如茄每根僅結子二三顆熟時夜以刀  
微劃其皮膏液流出凌晨收之而浸諸水數刻然後取  
出以物盛之再取其葉曝乾末之雜揉其中視葉末多  
少以定其成色葉末半則得膏半然後捏為團以葉裹

之子出膏盡則拔其根次年再種

案明呀喇海國見聞錄作珉呀或人又作

孟阿拉或作孟加臘實皆一地

海國聞見錄小白頭國東鄰珉呀國

一作明呀喇即珉今孟加臘也

呀人黑穿着皆白類似白頭英機黎荷蘭佛蘭西嶽此  
貿易珉呀天竺佛國也珉呀之東南遠及暹羅珉呀之  
南臨海珉呀之北接刺麻西藏及賽馬爾丹國屬

粵商回述孟阿拉地宜種植百物叢生終歲南風並無  
冬夏每洋銀一圓值彼處銅錢一百文白米一升值彼  
處銅錢一文其鴉片煙四季種收周流不息各國夷人



均向彼處收買每公土一件價銀一圓白土一包價銀六錢國王所抽稅每土一件約銀二圓運至中國每碼土計成本銀四圓有奇從前可賣至八九圓聞去年中國功令森嚴彼處夷發售甚艱價亦太賤每船煙土所售銀兩僅敷來往盤費所獲既無大利各夷均不願作此鴉片生理本年夏間由彼處起程聞英吉利國王以中國嚴禁已傳令以後停止製造並諭各夷不准滋事

南印度補輯

海國聞見錄曰小白頭南入于海之地曰戈什塔東西

南三面皆臨大海爲大西洋各國市埠所環據戈什塔東面沿海地名有三曰網礁臘則英機黎埔頭也曰房低者里則佛蘭西埔也曰泥顏八達則荷蘭埔頭也其西面沿海地名有二曰蕪喇曰網買則英機黎埔頭其地俱紅毛所建置此外又懸一島曰西侖大珠卽錫蘭山也此皆南天竺地

海錄曼達喇薩在明呀喇西少南由葛支里沿海陸行約二十餘日水路順東風約五六日俱英吉利所轄地至此別爲一都會有城郭英吉利居此者亦有萬人叙



波兵二三萬此地客商多阿里敏番卽來粵東戴三角  
帽者是也土番名雪邨里風俗與明呀哩畧同土產珊  
瑚珍珠鑽石銀銅棉花訶子乳香沒藥鴉片魚翅玃梭  
豸梭多形如小洋狗又有金邊洋布價極貴一疋有值  
洋銀八十枚者內山爲曉包補番曉包補者猶華言大  
也本回回種類其間國名甚多疆域不過數百里所織  
布極精細大西洋各國番多用之○笨支里在曼達喇  
薩西南爲佛卽機所轄地由曼達喇薩陸行約四五百  
水行約日餘卽到土產海參魚翅訶子棉花玃梭多內

山亦屬曉包補○尼古叭當國在笨支里西嶺介中疆  
域甚小土番名耀亞○西嶺在笨支里少北又名古魯  
慕由笨支里水路約六七日陸路約二旬可到爲荷蘭  
所轄地土番名高車子風俗與明呀哩畧同內山爲乃  
弩王國土產海參魚翅棉花蘇合油海參生海中石上  
其下有肉盤盤中生短蒂蒂末卽生海參或黑或赤各  
肖其盤之色豎立海水中隨潮搖動盤邊三面生三鬚  
各長數尺浮沉水面採者以鈎斷其蒂撈起剖之去其  
穢煮熟然後以火焙乾各國俱有唯大西洋諸國不產



○達冷莽柯國在西嶺西北順東南風約二三日可到疆域甚小民極貧窮然性頗淳良風俗與上略同屬邑有地名珈補者西洋客商皆居此土產海參魚翅龍涎香訶子○亞英加在加補西北順風約五六日可到爲英吉利所轄地土番風俗與上畧同土產棉花燕窩椰子訶子又曰固貞在亞英加西北水路順風約日餘可到爲荷蘭所轄地土番風俗與上略同內山爲晏得尼加國實回回種類土產乳香沒藥魚翅棉花椰子蘇合油血竭砂仁訶子大楓子○隔瀝骨底國在固貞北少

西水路順風約二日可到陸路亦通風俗與上同土產胡椒棉花椰子俱運至固貞售賣內山仍屬晏得尼加

○馬英在隔瀝骨底北少西水路順風約二日可到爲佛郎機所轄地土產風俗與上略同內山亦屬晏得尼加達拉赭在馬英西北陸路相去約數十里爲英吉利所轄地土番風俗亦與上同土產胡椒海參魚翅淡菜內山仍屬晏得尼加○馬喇他國

此與孟加臘音近地異此南印度彼東印

度也毋混爲一在達拉赭西疆域自東南至西北長數千里沿海邊地分爲三國一小葡萄一孟婆羅一麻倫尼爲回



回種類凡拜廟廟中不設主像唯于地上作三級取各  
花瓣徧撒其上羣向而拜或中間立一木椎每月初三  
各于所居門外向月念經合掌跪拜稽首土產棉花胡  
椒魚翅鴉片○小葡萄在馬喇他東南沿海邊界由達  
拉緒向北少西行經馬喇他境約六七日到此爲葡萄  
亞國所轄地疆域約數百里土番奉蛇爲神婚姻與明  
呀里同死則葬于土每年五月男女俱浴于河延番僧  
坐河邊女人將起必以兩手掬水洗僧足僧則念咒取  
水饋女面然後穿衣起又有蘇都魯番察里多番古魯

米番三種多孟婆羅國人西洋人取以爲兵西洋人居  
此者有二萬人士產檀香魚翅珊瑚犀角象牙鮑魚嘗  
有西洋太醫院隨船至此聞其妻死特遣土番齋札回  
大西洋祖家請于國王以半俸給其家養兒女是知此  
地亦有陸路可通大西洋也○孟婆羅國在小葡萄北  
山中由小西洋水路順風約日餘可至國境王都在山  
中以竹爲城疆域亦數百里風俗與小西洋同土產檀  
香犀角○麻倫尼國在孟婆羅北水路順水約日餘可  
到疆域風俗與孟婆羅同土產海參魚翅鮑魚二國所



產貨物多運至小西洋埔頭售賣○蓋几里國在麻倫  
尼北少西水路順風一二日可到疆域風俗與小葡萄  
畧同土產洋蔥其頭寸餘熟食味極清酣瑪璃棉花鴉  
片內山亦屬曉包補自曼達喇薩至卽杜土番多不食  
豕牛羊犬唯食鷄鴨魚蝦男女俱戴耳環○孟買在蓋  
几里北少西相去約數十里爲英吉利所轄地有城郭  
土番名叭史顏色稍白性極淳良家多饒裕英吉利鎮  
此地者數千人土產瑪璃大蔥棉花阿魏乳香沒藥魚  
膏魚翅鴉片番靛棉花最多亦南洋一大市鎮也鄰近

馬喇他蓋几里曉包補卽杜諸國多輦載貨物到此買  
易其內山亦屬曉包補○蘇辣在孟買北水路約三日  
可到亦英吉利所轄土番名阿里敏土產同上○淡項

讀平聲

在蘇辣北水路約日餘可到爲葡萄亞所轄土產

同孟買○卽杜國在淡項北疆域稍大由淡項水路順  
風約二日可到風俗民情與蓋几里諸國畧同土產鴉  
片海參魚翅俱運往蘇辣孟買販賣自明牙喇至此西  
洋人謂之戈什塔我總稱爲印度海土人多以白布纏  
頭所謂白頭回也遇王及官長蹲身合掌上于額俟王



及官長過然後起子見父母亦合掌于額平等亦如之  
其來中國貿易俱附英吉利船本土船從無至中國中  
國船亦無至小西洋各國者自此以西海波洶湧一望  
萬里舟楫不通淺深莫測沿海諸國不可得而紀矣其  
卽杜內山則爲金眼回回國聞其疆域極大不與諸國  
相往來故其風俗土產亦不可得而紀也

案金眼回回  
在南印度山

內言是中印度之莫  
臥爾白頭國也

### 附錄

魏源西藏後記曰滇南師範有言中國赴天竺佛國亦

有兩道一自雲南騰越州而南由緬甸城轉西以至東  
天竺凡三千五百里再至中天竺又千有六百里其五  
千有百里一自雲南麗江而西進藏至東天竺北界二  
千里又千有二百里而至中天竺僅三千有二百里視  
南道徑千有九百里以地望準之雲南之騰越州正與  
天竺東南相值止因其間赤髮野人隔之故一則迂道  
南行千有七百里至緬甸然後轉西至東天竺又西北  
至中天竺檀那國計三千八百里一則迂道西行入藏  
然後轉南亦至檀那計三千二百里使能取道野人逕



直西上則免由緬由藏兩迂途而自騰越達天竺不過千有九百里野夷若入版圖則與天竺境壤相接昔漢武開西南夷欲由梁州達大夏偉矣哉西藏記日由後藏塞爾地方西南十八程至宗里又八日至白木戎部落其地北接後藏西接白布南至小西天北界至小西天界南行十日至其國都布爾牙部落始上海船行半月至大西天小西天爲東天竺大西天爲中天竺又曰後藏扎什倫布西南與布魯克及白布等部交界白布即贊普取白布國王女之地布魯克即往天竺之路也

又一路由阿里西南二千餘里入厄納特珂克即中天竺其中藏前藏東南則以怒江爲界江以南即貉倫野人每藏中有死罪則驅之過江聽野人殘之

以上西藏記然

則怒江南岸逾野夷西境卽布魯克部與東天竺近而怒夷自雍正中內附歲輸皮貢於騰越界非不可闢之區則天竺與中國亦非不可接之境惟是東天竺卽今南洋孟加臘地久爲西洋英吉利所據專產鴉片煙流毒中國誠能募騰越土勇萬人渡江而西南長驅擣其背掖通絕域爲鄰壤實制西夷之一奇或曰大金沙江



自藏經緬其入海之口卽東天竺界其水闊於大江造舟藏地順流建僦尤倍捷于陸然有舟師之便而又有緬夷之梗利害亦適相當也

又乾隆征廓爾喀記四川雲南之西爲烏斯藏烏斯藏之西南爲廓爾喀廓爾喀之西南爲五印度印度古佛國在葱嶺西南瀕大海去烏斯藏尙遠或以烏斯藏卽古佛國者非也自四川打箭爐西行二十餘驛至前藏四十二驛至中藏又十二驛至後藏又十二驛至濟隴又三十驛至石宿堡爲後藏極邊地踰橋而西則廓爾

喀矣廓爾喀本巴勒布國舊分葉楞部布顏部庫木部于雍正九年各奏金葉表文貢方物後三部并吞爲一遂與後藏鄰自古不通中國其與中國構兵則自乾隆五十五年內犯西藏始初後藏班禪刺麻以四十六年來朝祝高宗七旬嘏中外施舍海溢山積及班禪

卒于京師資送歸藏其財皆爲兄仲巴呼圖克圖所有旣不布施各寺廟與唐古特之兵又擯其弟舍瑪爾巴爲紅教不使分惠于是舍瑪爾巴憤懣廓爾喀藉商稅增額食鹽糶土爲詞興兵闖邊唐古特兵不能闕



而 朝廷所遣援剿之侍衛巴忠將軍鄂輝成德等復調兵賄和陰令西藏堪布等私許歲幣萬五千金按兵不戰遽以賊蹙乞降飭奏而諷廓爾喀酋入貢受封國王廓爾喀既侮藐內地次年藏中歲幣復爽約于是廓爾喀以責負爲名再舉深入後藏札什倫布西南左有曲多江鞏右有彭錯嶺峭壁連岡咽喉天險賊步卒數千自聶拉木入其時蕃漢官兵若分兩路一扼曲多江鞏遏其前一繞赴彭錯嶺截其後則廓爾喀深入無援可不戰潰也駐藏大臣保泰一聞賊至則移班禪于

前藏并請移達賴班禪于西寧欲以藏地委賊且札什倫布寺負山面江形勢鞏峻刺麻數千乘墉可守以待援而仲巴呼圖克圖挈費先逸刺麻濟仲札蒼等復託言卜諸吉祥天母不宜戰衆遂潰賊大掠札什倫布全藏大震兩大刺麻飛章告急侍衛巴忠扈 駕熱河

聞變畏罪自沉水死時鄂輝爲四川總督成德爲四川將軍因盡以罪委之謂巴忠解唐古特語故私議皆其一人所爲已二人不知也及奉命赴藏剿禦又按程緩進 上知二人不足恃乃 命嘉勇公福康安爲



將軍超勇公海蘭察參贊調索倫滿兵及屯練士兵進討其軍餉則藏以東川督孫士毅主之藏以西駐藏大臣和琳主之濟隴邊外則前川督惠齡主之賊狃于上年賄和之役半運所掠歸國半屯界不去鄂輝成德等遂奏賊退欲卽以歲事 上切責不許明年二月將軍參贊由青海至後藏四月連敗其屯界之賊盡復藏地六月遂大舉深入恐賊繞襲後路遣領隊大臣成德岱森保及總兵諸神保各出左右一路以分賊勢而大軍出中路海蘭察將三隊爲前軍福康安將二隊繼之

賊據木古拉山阻水拒險將軍議令護軍統領台斐英阿與賊相持而大軍別趨間道海蘭察繞山後出賊營之上福康安由間道合衝賊營其克木柵石卡數十追奔至雍野雅而成德諸神保亦克鐵索橋進會利底廓夷舉國震懾遣使詣軍前乞降將軍參贊嚴檄斥之七月再進六戰六捷殺賊四千涉賊境七百餘里將近其國都陽布之地隔河大山賊以十營踞山嚴守水深山斗絕山後卽其國都也福康安欲逾橋攻之海蘭察力持不可福康安自引兵渡橋仰攻果不利賴海蘭察按



應退賊方是時其國境南鄰印度之地久爲英吉利屬國與廓夷積釁間廓夷受兵於中國則亦出兵攻其邊鄙廓夷兩支強大敵洵懼無計且恐我軍聞而氣奮也再遣人詣軍卑詞哀乞將軍參贊議以賊境益險而踰八月卽大雪封山不可老師乃允其降盡獻還所掠藏中財寶及塔頂金冊印歸前被執之丹津班珠爾等并獻沙瑪爾巴之尸貢馴象番馬工樂請永遵約束班師上本欲俟事平裂其土授諸土司而酬福康安以郡王爵及聞已受降乃允其請留番兵三千漢蒙古兵

一千戍藏是爲官兵駐藏之始後藏至廓爾喀故有孔道賊嚴守之故我師覓間道入其峭絕處左壁右湍不容一騎將軍參贊亦時步進故所貢象竟不能達而烏拉嶺上下百二十里必窮一日之力踰之稍昏黑卽不能覓路且有雪城若門洞深數十丈人往來者不敢語否輒有雪大如屋壓而殛之廓爾喀寇藏時運費歸國者二千人過嶺凍死殆盡蓋葱嶺之南春天所以限中西也險倍金川遠踰回部爲漢唐兵力所未至幸其士卒皆跣足每戰仿古法先約期而後交綏我軍不顧輒



先發揜襲往往猝爲我乘自大剗以後至今貢獻不絕其國西南與五印度相鄰其南海號印度海近日印度之孟加臘及孟買等國爲西洋英吉利所據乾隆六十年英吉利使臣入貢自言前歲大將軍率兵至西藏西南之密部落時彼國兵船亦會相助倘嗣後有需用西洋兵者情願効力 朝廷始知前此廓爾喀之役

其南界亦有邊警外患也道光二十年英吉利夷人入寇粵浙廓爾喀亦遣人稟駐藏大臣言小國與里底所屬之地相鄰每受其侮今聞里底與京屬構兵京屬屢

勝臣願率所部往攻底里屬地以助天討時駐藏大臣未知所稱里底卽英吉利所稱京屬卽謂中國之廣東省所稱底里屬地卽印度答以蠻觸相攻 天朝向不過問卻之蓋英吉利國都雖遠在大西洋而其屬國印度則與廓爾喀接壤世仇構釁故我攻廓則英夷乘之我攻英則廓夷亦願助之云

臣源曰廓爾喀界西藏及鄂羅斯攝兩大國之間故內貢中國亦兼貢鄂羅斯近日英夷西與鄂羅斯構兵東與中國結釁故廓爾喀欲乘兩大國之勢以攻印度云



印度地產鴉片煙英吉利關稅歲入千萬計其兵船人犯中國者十九皆孟加臘之人誠能聽廓夷出兵之請獎其忠順擾彼腴疆擣其空虛牽其內顧使西夷

失富疆之業成狼狽之勢亦海內奇烈也 羅斯地表

二萬里與中國首尾相接地大兵強西洋所畏其與我

互市之地則有陸而無海英夷之與我互市則又有海

而無陸近日鄂羅斯屢與英夷爭韃韃里之地其地橫

亘南洋鄂羅斯得之則可以圖并印度故與英夷連年

血戰 雍正五年俄羅斯攻取西藏西南五千里之務魯木以地尙佛教遣人至中國學刺麻當即與廓爾

喀相近 若能許鄂羅斯海舶赴粵貿易連絡彌利堅佛

蘭西等國皆英夷仇敵則英夷之兵船不敢舍其境而

遠犯中國 英夷在印度大兵船止百艘以其半入寇中國其餘皆分守各境不敢遠離恐他國乘其

虛 也夫以夷攻夷之效也見者視爲迂圖乾隆嘉慶間一

封暹羅遂足以西制緬甸東制安南善奕者或一閒著

而全局皆生况以宅中馭外之勢制仇讐四結之夷哉

此篇互詳俄 羅斯國後記

又俄羅斯與印度構兵記曰大海南洋曰印度海與後

藏緬甸相鄰而廓爾喀介其中其鄰廓夷之孟阿臘則



東印度也再西南之孟邁等部則南印度也溯印度河

北上為溫都斯坦則中印度也溫都一作與都一作痕都即印度之音轉再

北為克什彌爾古蜀賓國則北印度也印度河兩岸凡

巴社各白頭回國則西印度也白頭即白帽回其國皆在葱嶺

西南接中國西域近日西洋英吉利自稱管理五印度

蓋惟北西印度未為所據其東中兩印度半屬英夷而

南印度則分據于西洋諸夷此皆近日事也方康熙雍

正間英夷僅據有孟阿臘孟邁二埠未窺印度全境而

鄂羅斯亦方與西北普魯社構兵未遑南牧北葱嶺以

西瀕地中海東岸皆統於天方之回教故乾隆中西域

甫平溫都斯坦尙與巴達克山構兵雖旋為愛烏罕所

并愛烏罕即古大月氏亦回教非西洋教及乾隆嘉慶以來鄂羅

兵由黃海攻服黑海各部又日沿裏海南侵而英吉利

亦吞并溫都斯坦派恆河北上于是葱嶺以西自布哈

爾愛烏罕諸大國外凡近裏海之游牧回部號韃韃里

者皆并於鄂羅斯北夾恆河及南洋之城郭回國半屬

於英吉利矣裏海即加士比掩海亦名鹹海亦名北高海明史謂游牧之蒙古曰韃韃西洋人謂

游牧之回部曰韃韃皆音近其英鄂二境之中尙隔有數回國彼此



各距數百里及道光十九年温都斯坦北境有阿付顏  
 尼部者與沙蘇野部相攻沙蘇野曾請救于英吉利英  
 吉利遂起各印度駐防之兵攻滅阿付顏尼部阿付顏  
 尼酋亦走愬于鄂羅斯鄂羅斯復起駐防韃韃之兵南  
 攻巴社取機注取木哈臘欲恢復阿付顏尼部以直攻  
 印度英吉利兵據險力拒于是英鄂二邊境僅隔興都  
 哥士一大山而血戰無虛日矣

興都郎印度二字音轉其山界北中二印度之間

阿付顏尼及沙蘇野一部皆在是山之南機注及木  
 哈臘皆在是山之北而沙蘇野之部落亦有軼出山北

者是為英鄂交惡之由與交兵之界沙蘇野王以道光

十八年為阿付顏尼破走投援印度時英吉利鎮守印

度之大兵帥曰□□□副兵帥曰沙機尼遂于十九年

七月起孟阿臘孟邁温都斯坦三部之兵使沙機尼將

之而沙蘇野酋自以所部兵鄉導時阿付顏酋自都於

加模爾城遣其次子以兵三千五百守牙尼士城長子

以兵數千守加布爾城牙尼士城本險固于其城門前

復增重濠重墻守營甚固英吉利軍先營近郊誘戰不

出乃督馬礮軍駱駝礮軍步礮軍三路進攻

此三軍謂以馬負礮



以駱駝負礮  
以人扛礮也

又開天礮擊之天礮者仰空發礮飛墮城中遂偪城而營并以兵扼加布爾援軍之路阿付顏尼會遣其長子領千五百騎步兵三千由加布爾城赴援夾攻後路爲沙蘇野部兵擊退次日遂會各營專攻城門更番迭進城內兵亦死力鏖戰旣而天礮從空而下城中震競爭潰遁凡二晝夜拔其城禽其次子乘勝兩路進攻加布爾城阿付顏尼會同其長子率兵萬有三千守格麻關而軍士奪氣望風解體父子率三百騎走保麻緬棄芻糗火礮輜械山積英吉利遂據二城遣沙

蘇野王復國酌留歐羅巴兵溫都斯坦兵及阿付顏尼新降兵助守其地此英夷侵北印度之事也阿付顏尼旣遁麻緬則遣使乞師於鄂羅斯鄂羅斯鎮守韃韃里之兵帥久豔東南印度之富特隔于各回部至是棄各部自閔謀由巴社以圖印度巴社者回回祖國卽來粵貿易之白頭番所謂港脚者也小白頭爲溫都斯坦大白頭爲巴社巴社雖不屬英吉利而與英吉利睦故英帥律屋蘭者以兵助巴社拒之鄂羅斯復以收逃奴爲名襲破機洼及木哈臘二回部又攻取沙蘇野所屬三



部之在興都哥士山北者遂駐兵荷薩士河與英吉利  
中印度接界并使人習印度法律言語又購木哈騰人  
嚮導無一日忘印度而英吉利亦嚴兵阿付顏尼界爲  
備且議還阿付顏尼會于故地以息外構而增藩蔽議  
未定而廣東之事起是年 大清怒西洋鴉片煙之  
耗盡中國 欽差大臣赴廣東嚴禁鴉煙并罷英夷  
互市聲其罪惡布告諸國諸國如佛蘭西彌利堅讎英  
夷者咸稱快廓爾喀亦白駐藏大臣願所部兵收東印  
度又傳聞鄂羅斯使臣已自比革爾國都起程赴

北京約中國兵由緬甸西藏夾攻印度事雖未行而英  
夷則惴惴甚或欲乘鄂羅斯使臣未至 京師之前  
速行人寇或料中國疑鄂羅斯更甚於疑他國未必遽  
信其言是時南洋西洋諸國聞罷市之信各埠茶葉大  
黃皆不肯售踊貴價倍而英夷國中繳煙價罷關稅各  
缺銀千餘萬員諸銀肆皆不肯出貸銀價復翔貴借貸  
鄰國銀肆數百萬充兵餉而彌利堅佛蘭西先後在粵  
請助兵船爲中國効力亦屢見於粵中督撫及將軍之  
章奏事則可徵也時則可乘也前廓爾喀記中以夷攻



夷之議尙或迂之而不察故復述是篇而以澳門探報附其後

臣源曰由近事溯之乾隆則準魯阿睦爾薩納之來投請兵也盈廷喙拒獨高宗排羣議用之遂一戎衣

而定伊犁矣土爾扈特之棄鄂羅斯來附也盈廷喙拒獨高宗排羣議受之并移檄鄂羅斯剖明曲直卒

盡臣瓦刺四大部矣由近事溯之康熙則俄羅斯所部東徧黑龍江聖祖附書荷蘭轉達鄂汗海道往還

半載得報遂擴索倫地數千里矣準噶爾請援兵六萬

于鄂羅斯

聖祖移書宣示利害絕其糾約噶爾丹

敗無可投卒潰竄死矣

聖神籌運於廊廟之間而

指麾使於數萬里之外豈不在識夷情洞敵勢哉西藏一陷於準噶爾再陷於廓爾喀彼時氛惡焰熾孰不畏道遠勞師而兩朝深維利害不惜架入撻伐恢

域犁庭是以北攝準夷西震印度奕世而後尙有願效馳驅之廓夷夾攻印度之鄂部請助海艘之島國待我驅策同我敵愾故曰天下有道守在四夷此擊則彼應威立則令行事會之來聞不容髮哉



附澳門月報

即所謂新聞紙

道光二十年七月澳門接印度五月十四日來信

即中國四月十三日

論及鄂羅斯欲攻打印度之事蓋我英

國之印度兵攻取與都哥士山

近巴社國

南邊各部落

而鄂羅斯邊境在此山之北三年前尚有回數四

五國互隔英吉利與鄂羅斯屬國之間各遠數百

里今止隔一大山而已鄂羅斯近日直攻至韃韃

里之機注

韃韃里謂游牧回部如哈薩克布魯特之類東起葱嶺西至裏海南界印度北

界鄂羅斯皆是也機注

皆因我等攻取阿付顏尼

部

此部原屬巴社今為英吉利所據在印度之西巴社之東北韃韃里之南

故鄂羅人

亦攻至荷薩士河

韃韃里地近機注

已約木哈臘

亦韃韃里南方

部落近阿付顏尼

同取阿付顏尼部以攻打印度為我英

國兵頭沙阿力山及馬約里治堵禦故計不行鄂

羅斯前在希臘

巴社國東方部落近阿付顏尼

與巴社人立約欲

收服阿付顏尼以攻取印度亦因我兵頭律屋蘭

所拒

巴社即白頭回國南抵海西界都魯機北界韃韃里

後詭稱收回逃散

奴僕突攻取機注及木哈臘人皆謂鄂羅斯既得

此二地當必退兵乃又日日使人學習印度事務



又與木哈騰人立約同取阿付顏尼不知鄂羅斯人要到何地方肯住手現聞鄂羅斯使者已自比

特革起程由韃韃里到中國 此韃韃里謂喀爾喀蒙古蓋凡各游牧部

皆之謂 必懲懣中國人與英國人爭鬪并欲得

北京出 諭與緬甸人使前來攻擊不知何

時使臣能到得 北京我等切不可閉目不理

鄂羅斯人曾以兵威自黃海攻至黑海一帶地方

以廣其國境所以今日必要隄防其在荷薩士河

駐札之兵前來攻擊倘我將阿付顏尼防兵撤回

則鄂羅斯人必帶領木哈臘之兵同攻阿付顏尼

矣我等今年若將阿付顏尼王復立於加模爾城

阿付顏尼舊部 即應帶兵過興都哥士大山取回沙蘇野

所失去之三部落 一口袞都斯一日麻爾格一日模特散皆在阿付顏尼之北木

哈臘 然我兵到彼必定遇鄂羅斯兵與木哈臘兵

約會夾攻我兵我兵恐即擾亂而回亦或與鄂羅

斯人相持大抵英鄂二國在阿細亞洲交戰之事

不久即至我等宜先預備出兵矣







